

抱

冲

齋

詩

集

抱冲齋詩集卷十五

長白 斌良 笠耕

灤河于役集一

二月二日奉

命偕湘浦相國

松筠

赴東土默特讞案

晚宿孫河旅次題壁

載陽時節速郵程
冰泮流泉作雨聲
山店春紅桃萼斂
官橋晴碧柳煙明
長沙攘界交章訟
京兆平反露冕行
稍喜路公多矍鑠
硃砭磋切幸相成

牛欄山寺小憩時村中祈雨

彎環蛾綠暖煙凝
眯目浮埃晚未停
深澗漫投虓虎骨
祝霖僧代誦金經

晚抵密雲縣

去年遠涉青海塙足行萬里胸豁然入山我豈是生客肩輿丁
訝疑飛仙鷹風漉漉沙磧漁村淡沱鋪春煙密雲有渰釀甘
澍叱犢聲起緣高田

古北口

翠巖缺處擁孤城小隊弓刀候吏迎沙苑草肥堪試馬塞垣柳
老不聞鶯時平險隘空殘壘歲宴屠沽雜戍兵鎖鑰北門需坐
鎮早修虎旅翼神京

波羅赤大風

嵐翠睇蒼茫毘藍大力揚野多不羈馬地有未開荒斷塔穿雲
矗驚飈走石狂鬱蔥佳氣接東望企遼陽

晚次喀拉河屯

茸帽衝寒第七程頻經
變輅嶺猶平寒峯疊浪具奇勢河套

彎弓饒遠情立馬浮橋攀柳細焚香野廟叩鐘清春波吹縹蒼
雲黝雅稱灤陽古邑名

喀拉河屯華言黑城也

建昌縣

柳色沿邊古塞長輕飆暖入紫絲絢魚鱗萬瓦鋪煙海一髮寒
山指建昌

三月十一日晚雨山寺寫懷

潑墨雲濃雨送涼綠蘇古蘚畫鄰牆暄寒莫定裘還葛飲噉多
方酪間漿雀角露情端漸息馬蹏歸思路偏長山王劇喜聯晨
夕燒筍齋廚約細嘗

十二日新晴邀竹汀都統邱主政行館小集仍疊前韻
蔚藍晴宇颯風涼花片繽紛度短牆鴉點香林宜夕照僧分齋
鉢潤餘漿屋連塔院雲常住座有鄉人話易長早檢巾箱作歸

計含櫻猶及得先嘗

夜坐東竹汀都統邱主政三疊前韻

環坐松齋笑語涼
統如漏鼓隔東牆
聯牀恰待閒聽雨
得酒非緣過乞漿
醉態暫騰桃浪淺
羈懷旬線柳絲長
草肥鹿塞堪調馬
跌宕豪情待試嘗

十三日夜歸散步庭宇漫成

九霄雲埽鏡開
匳羣籟聲沈夜氣嚴
奏草書成辭待削
茗花乳潑火休添
風搖檐角鈴傳語
煙霽林腰塔露尖
回憶年時趨畫省
薇花紅上水晶簾

佑順寺大風僧房題壁

翠浪塵風萬樹狂
講堂清切暫相羊
紀游暇少詩篇減
折獄神疲案牘忙
硯匣香融含雨氣
瓶花紅小透春光
窗油靜掩松寮

碧洵美山中歲月長

三座塔春暮寫望

古塞過三月穠春只二分草痕青乍轉花事豔無聞野曠煙浮
樹峯高雪化雲雁書遲未達鄉思託榆粉

十八日佑順寺佛會達賴喇嘛拉喜色楞導至正殿禮
拜畢卽題方丈

班第披黃導開堂證妙詮綵圖番像幻酥熬梵鐙圓樞拜聊從
眾游觀洵有緣棗花山寺畔瞥眼別經年

山寺夜雨

風信剛移棟子梢晚鐘一杵隔煙敲偶過蕭寺逢僧話小立林
陰數鵲巢

周遮蛾綠媚煙姿攜榼尋芳恐後時澹對香雲搖塔影驚移難

定似歸期

一籌佛火報黃昏
敲枕攤書靜掩門
料得牆東賢主客
高粱瓦注正須溫

粥鼓聲沈放晚衙
豆房深窳寂無譁
簿書堆裏閒身掣
又向窗鐙鬪八叉

宿雨初霽佑順寺西禪舍聞海潮用東坡號縣渡渭夜宿僧舍韻

雨餘風定正深更
檐鐸聲微鵲不驚
窗白眼塵空障礙
鐙紅心鏡印光明
地當鹿塞宜綏服
學愧龍轡漫噉名
滄海滔滔夜東下
潮音風度耳頻傾

朝陽境接遼陽錦州海潮聲大夜常聞之

登佑順寺佛閣

躡足初枕乘興登鐸鈴
風引畫欄凭晴嵐
潑黛濃於佛古塔披

雲瘦似僧怖，鷓鴣巢穩未征驂。
繫柳記過曾宗雷，近約同蓮社。
操襪相羊快得朋。

出佑順寺遠眺

濃淡浮嵐暖未消，寺門延矚塞天遙。
夕陽紅動鴉翻樹，柳色青隨馬度橋。
耒耜並興開甸服，輶軒小駐採風謠。
契丹城改興中號，細讀殘碑訪牧樵。
三座塔即遼契丹柳城元改爲興中府初有文字碑陽係遼碑陰首載元興中府因
此知名見本朝清格素齋塔子溝紀略

夜發公家營早抵松鶴溝

朝露霏微潤草痕，魚雲開處漏朝暾。
阿蘭基廢餘殘塔，塞柳陰濃失遠村。
行篋新詩煩友和，偏提篋釀倩童溫。
頻年四牡馳驅慣，櫻筍佳時半出門。

松溝道中

首夏清和節輕寒未著紗莫嫌村店僻山杏滯餘花

建昌縣晚宿

深溝松鶴少勝境屬傳聞雨氣浮山動溪流觸石分平沙通雁

路豐草健羊羣毳幕看碁布荒場喜未耘

近日土默特旗地多開墾游牧之區甚少

獨松溝一帶仍屬牧場牛羊亦頗茁壯

皇華催驛騎暝色馬頭生向晚山逾碧過橋水獨明綏藩官有體出塞郡無城夷夏胥歸一防秋撤戍兵

冒雨自建昌曉發

山徑泥深策馬遲峭寒暗襲敝裘知山農白榻涼宜睡星使皇華曉尚馳鞭鐙穿雲潑墨旌旗影捲雨如絲板橋茅店風光好麥浪平翻輓翠滋

雨中喇嘛障子早飯

溼煙深處鶉鳩啼星飯蒙茸晚未栖山驛雨涼裘再著塞垣春
晚麥初齊草香古渡魚苗秀花蘸新泥燕子低長日如年行役
好蹇驢嘶處夢都迷

梨樹溝

螺峯宛轉翠雲遮高柳陰森石磴斜帽影鞭絲休得得雨香山
店趁梨花

櫻桃溝

風號幽谷午猶寒嵐翠淋漓潑眼寬正是含桃初薦候惜無火
齊爨堆盤

廿九日雨坐山寺西禪舍

蕭寺題詩記姓名柳邊春晚滯歸程牆低翠擁山無數院靜簾
垂雨有聲淺醉葡萄欣力薄倦依蒲薦覺心清苾芻過我閒攀

話石證三生舊結盟

是日拉喜色楞喇嘛
贈藏佛一尊爲余壽

飯後登藏經閣遠眺陣雨忽作

養花天潤負郊游且豁詩襟上佛樓綠野農歌聽乍近寥空雲
葉布初稠參差屋宇炊煙淡岌業峯嵐雨氣浮窳堵波看雙筆
卓探奇何暇出鳴騶

四月四日讞案事竣旋京曉發三座塔喜成

細草鋪茵趁馬蹏薄陰含雨度前谿鬢鬟遠岫青於畫楊柳旗
亭句待題曉發輿夫行倍捷春遲隴麥種初齊簿書鞅掌過三
月尙憶來鴻印雪泥

平房小憩題驛舍壁

高岸如隄駮馬盤午雞聲裏駐歸鞍叢祠簫鼓村巫集小市魚
鹽估客攢塔古微看青粉脫林遙只覺綠煙團甌廬半撒蒟蒻

築邊塞從知禮教寬

晚次波羅赤酒家題壁

乘輶當首夏新麥翠鋪氈貼翠峯千笏梳煙柳半川時平兵戍
少驛肅使歸便村酒高粱賤無妨旅話聯

還京喜成

雀角蠅頭永息爭爰書兩月費研精

恩覃朔漠藩封服化仰東京

帝澤閑野老扶鳩遮道拜名王獻馬出郊迎使臣歸觀

天顏喜虞芮從今慶質成

大廟早飯

蘭若伊蒲一飯畱塞垣荒率少星郵過欒陽以東卽土默特地界例無驛站乍披

雨帽還風帽纔渡梨溝復柳溝柳溝距熱河六十里梨花溝距熱河一百八十里墨點

牛羊緣嶺徧梭穿燕鵲掠波柔遐方欣漸興文化泥壁高懸
御翰適壁間懸乾隆戊申游金山寺詩墨刻一幅

同懷弟法良校刊

男崇福謹校重刊

抱沖齋詩集卷十六

長白 斌良 笠耕

鏡鷗寄懷集一

四月十八日過大樹庵壁間懸于金壇相國書乾隆御製香山首夏八首敬步原韻題禪舍壁

山櫻暖欲然庭柏翠如滴古寺枕湖堧宜弄桓伊簫
日午松陰圓禪扉人迹少埽除一室坐游心向天表
已公設茶瓜紫餅偏提注仰看屋漏痕今年足甘澍
夏入嵐氣重紫翠雲霞蒸三山路咫尺仙閣未教登
拳虎不須柙子城環古木遙憶涼鴈臺草色芊芊綠
征鞍欣乍卸出郭眼界寬侵曉巾車過蘋風助麥寒
萬綠密如織山禽時有聲鳶魚具真契萬物盡其情

西峯萬笏攢濃翠
潑窗戶霹靂殷
南山飛空作霖雨

峩冠

峩冠冒暑詣晨衙
瘦馬鈴鐸逐敝車
管見漫誇班測豹
筆飛爭羨墨翻鴉
是非彼此原無定
雲夢汪洋詎有涯
機息漢陰羞抱甕
案頭秋水悟南華

門堪羅雀愛幽居
灌木鳴蜩歷夏初
富貴競趨嗟塞馬
神仙飽食陋蟬魚
湮流王廣疏
長策漕轉牟融集
異書蘭草含芳磐石介
晚香有待好風嘘

六月六日雨中早衙歸坐鏡鷗齋仍疊前韻

涼雨廉纖散曉衙
青泥深巷礙行車
御河膩漲初浮棹
官柳煙濃欲溼鴉
瀟灑宦情梅氣息
清醕詩格靜生涯
去年此日朝

仙樂袖挹荷香萬頃華

客歲自那林果爾查馬恭復恩命於是日靜宜園召對

徑掩蓬蒿仲蔚居
櫻鞋行趁曉涼初
聽詩竹榭閒招鶴
學釣蘆漪待種魚
延伫晴燒丙丁帖
久疏雨訊子公書
墨雲未轉西南陣
那得雄風噫氣嘘

久雨連旬寂悶無俚坐樂壽軒偶題

九衢車汎濫泥渾
巾幘慵施懶出門
四面風軒幽竹裏
簾波吹上翠煙痕

林梢潑墨積霖陰
蝸篆天然翠壁侵
幽折虛齋無長物
半牀書擁一張琴

雨中齋宿

三日虛堂致恪虔
危坐心齋屏閒語
晚衙鴉噪吏人歸
滿地槐花漲秋雨

鸛官騎馬日趨直
九陌泥深橫潦積
乘漲龍驤載米來
那愁陪

祀宮袍溼

近日運河淤墊糧艘阻滯雨多湖漲羣舸畢集故及之

秋日出西直門

輕車出郭趁新晴翠嶺黏雲豁眼明荷氣過橋香轉郁槐花糝
徑暑初平飛奔渴驥誠何謂清到疏蟬尙有聲幾棱瓜壺三畝
宅買田陽羨計將成

曉題大樹庵

秋風扇微涼際曉蟲語歇老僧正上堂疏鐘帶殘月

將至西直門卽目

萬樹碧無次林梢樓櫓浮鴻冥高接漢蟬澀語鳴秋園菜憑官
送溪魚好自謀餌香聞說餅觸忤舊村游

過聽雨樓

小樓六月懶躋攀秋入登臨爽破顏遠樹碧藏亭一角晴峯虛

染黛雙鸞雋游瞥眼詩增慨淡對低眉佛共閒賸有舊時書滿

篋來禽細賞墨花斑

樓藏余近年所書各種帖

樂壽軒雨後作

菟裘舊築鳳城西喬木蒼藤翠巘齊公暇水窗時宴坐不邀客
玩自畱題

今年六七月多雨疊翠鋪茵厚積苔一碧喜無雙展破翻欣深
院少人來

鏡鷗齋喜晴

芻尼檐際驟飛聲窗日晶瑩愛老晴花纈似添新侍者尊彝靜
對古先生茶防破睡烹嫌醎詩翼名家改未成招隱消榮他日
事素心早與雪鷗盟

七月十二日節近中元命兒子延福恭赴良鄉縣祖

瑩拜埽入夜大雨不歸念之不能成寐越日始歸書此以示之

讀書貴得閒猶必身歷之余讀第五傳藉詳倫設施客或叩平生吾子其有私答曰人恆常言無是乃欺父黨數親誼猶子號比兒余姪適遭疾撫視義莫辭一朝三往覆歸寢神安怡子病日一過勿寐展轉思此獨非私何告汝其勿嗤於此迹近密甫退竟或遺於彼似轉疏繾綣中心維哲言垂世訓閱歷乃盡知今秋值中元祭掃家範垂而我應入直秉笏趨丹墀命延福往代巾車丙舍馳去時風日美雲淨天晴曦入夜澍雨霖滂沱達旦滋倏焉山漲發積潦橫路歧言歸期偶愆注念情爲移良鄉距神京一舍程有奇塗無山川阻何由致顛危念切防所致舐犢母乃癡披衣起彷徨欲禁不自持因知愛所鍾不以賢愚差

骨肉具至性千載同秉彝以愛及推愛敬憶慈氏慈昨年奉星
使萬里行邊陲驚沙青海接古雪祁連吹酪漿充糗糧氈毳裁
房帷仲秋若嚴冬風勁寒砭肌六盤共四望登陟尤險巖四望盤山皆望經極險之處
眉翻因見面喜殷系情堪追慈母於愛子視老如童時衣裳及
飲食瑣屑勞周諮仰體慈母思兒敢膝下離遠游必有方聖語
微隱窺寄言孝思者孺慕誠如斯書意示延福繹言當學詩

題楊雪椒比部

慶琛

秋窗滌筆圖

秋宇兮沕寥商飆兮蕭條據梧蔭兮滄翳鎮石榻兮瓊瑤仁雲
衣之漠漠聆泉筑之汨汨眷子兮神怡染翰兮磅礴散卓兮縱
橫滌之以淨淥灑餘瀋兮紅蕉映綠天兮容與勝赫蹏兮陸離
羌以遺於遠者繫予懷兮懔懔駕四牡兮西征持龍節兮要服

邁青海兮來庭飫酪漿兮羈幕淒氈裘兮古雪邇文囿兮翱翔
時不可兮驟得披斯圖兮侘傺期十年兮讀書攬子袂兮懷恨
日康娛兮修竹吾廬

贈大樹庵

圓印

和尚

鶴貌清癯儼若僊總持妙湛徹中邊詩花香散曼陀室汲水聲
聞雪竇禪隨分齋鹽皆本色逢場語默得天然藏身人海都生
慧坐穴蒲團四十年

圓澤三生結契陳翻緣腰笏約齋鄰烹茶蠅眼堂頭熟聽講我

羣座下馴瓦鉢頻分香積粟木犀偶證玉華因

玉華岫寺僧靜
徹新贈桂花一

株將放

那容不借牆頭挂共賞經霜榭葉勻

游北山諸寺至黑龍潭而歸欲游大覺寺未果

偶爲看山三日畱老僧相送傍經樓襟期澹泊真風雅詩格清

嚴寡唱酬擘絮涼雲幕高柳按藍膩漲匯荒溝秋霖偏阻登臨
約擬辦都籃訂後游

大樹庵夜坐題

榭葉戰秋風蕭蕭聽疑雨呼童起尋看月色涼如許

由大樹庵至大有莊望昆明湖上玉泉諸山

看山興胡勇柅車乘曉晴槎枒詩思殷時共山雲生荷氣撲衣
澹松吹掠耳輕雲開鳩鵲麗岸齧龜魚橫意行度湖堧翠潏搖
光晶莊仍大有厯橋以安和稱樵歌聞稍起滌耳遠市聲茅茨
酒旗卓宕蕩朝暎明甘瓜碧藤蔓林棗朱實成槐夏暑漸闌白
袷涼颼縈羣玉濃黛潑蕭爽接太清中藏四百寺縹馬尋碑銘
村翁佩牛歸相值依柴荆語叩城市米價近可平

過望兒山麓

輶車度南口岌業一峯仰登頓惜未遑王事正鞅掌煙霞成結
痼紫翠仁恂悅清秋脫朝簿選勝僧導往脂車衝犖煙焚眷
森爽梯頭陟層顛知費屐幾兩危構象緯逼閣殿極軒敞風戾
燕雀避草淨麋鹿養孳斂寒襲袂方冬景堪想松疏敲瘦石畫
本倪黃仿壞壁自題名重來溯疇曩

太子府

亂峯多似客出郭歷卅里鳴鞭過野田飢鴉瞥驚起溪迴屈印
文輕颼拂波靡老馬惜障泥蹠踐行復止水柳眠秋灘倡條縮
斜晷山棚餅師家水引羅殘几卓午我僕痛買食車停軌迴睇
玉泉遙繡壁煙嵐紫雲葉挂塔尖觚棱鎮山皆畦町畫方罨橫
縱協條理澍深黍苗芄粒實翠葉薺樂天貴任達浮生等寄耳
雖乏封圻畀歲稔實堪喜官非馬曹閒雋游那到此

永福寺

殿前一碑乃明景泰七年建祭
酒胡漢撰文武清侯石亨檀越

谿坳香界蟠線徑榛莽合寺門大鏡圓青愁吠涼蛤利竿隻非
雙寺扉起還闔映階三松蒼碧幢儼斜搭虬枝走之而韋畢遜
攀揚升堂叩精藍驚起棲檐鵠經廚兩眉列梵夾紛颯還楞嚴
久不看蟬蠶恣吐欲畫壁金彩繪試燭然絳蠟姑古性所耽豐
碑讀香閣胡公摘藻雄摸文薛花匠景泰歲丙子七年建廟塔
石氏武清侯檀越金錢納媚行祝皇釐布政實其闕奪門肆跋
扈固寵比朋盡罪謙太無名謬論厭嚙沓亨也巧逢惡刊名待
摧拉俯仰感豪雄涼葉商颿颿凝師下階迎茶色衣壞衲寺僧名凝
然眉龍耳竅聾畏聞眾嘈雜問年示以指七十二僧臘支筇立
斜陽霞影紅韎韞此游殊鶻突惜未具蠻榼癭瓢汲芳泉參茶
穴禪榻

黑龍潭

拍泊齋詩集卷十六

八
四
文
聖

沮洳膠雙轂青驪行趁趨騰尾白沙明
菰蓴翡翠涵橫峯儼畫障珍樹羅香枿
厯止翠煙麓小憩停驂紅牆古蘭若蟬
聯寶殿三褰裳厯階升百級依晴嵐雷
祖列寺左配享尊瞿曇中建老龍座介
徒森矛鏃迤邐步向東淨綠開澄潭周
遮碧玉蟄月樣風廊弇俯瞰淵澄泓圓笠
天影含卵石簇錦汭黑白黃朱藍朗澈鑑
纖末薛髮垂鬢鬢空嵌滴膏乳穴洞鑿雲
龕蒼藤厯千載蔓絡峯岢嶇神龍宅其下
罔敢驅珠探允稱四靈首潑墨飛霖甘旱魃
偶爲虐神亦蒙嘲吟或投虓虎骨協和資
贊參或憑駕鵝血惡怪驚饕餮焚炷肆苛
政伐邢藉狂譚皆非祀之宜要在邳治諸
政通民康濟潤物澤立覃時和雨暘若田
父歌嬉酣敬讀

御製文闡理欽粹醺拙毫句初就雷殷南山南

九月朔日游宏善寺題壽安和尚方丈

韋氏林亭草樹荒精藍依舊枕園傍東風雪柰春難覓圓月霜

松壽更長宏善寺傍嘉靖時寺人韋霏建園極宏爽園中雪柰爲京師諸名園之冠見日下舊聞題壁墨

飛傳畫鶴東壁有陳太守手書徐文長畫鶴賦東壁禹鴻臚繪松鶴圖尤精洵爲二妙游人多賞之施田碑

古記貂璫寺西有短碑爲司禮監太監韋霏施田記約垂楊野寺增茶話二老風流

萃講堂

九月十九日雨後出西直門去年今日自湟中還京驀

然回憶感賦此什

寒雨洗秋色埽空雲氣低疏紅霜葉路涼翠晚松畦煙趣輸鷗

夢勞蹤信馬蹏回思青海使歲紀一周齊

散步聽綠山莊

老圃意行得繞畦涼翠痕官閒秋夢瘦寒淺敝裘溫闥徑多栽
菊尋詩且閉門題餽過七日兀自雨風繁

海懷軒夜坐

一室小於斗難鐙照壁清天晴窗得月秋老樹無聲撥鼎閒烹
茗披裘默數更半牀經與酒仙佛總難成

過姚伯昂太史寓齋

院邃明花纈譚深換茗甌秋心良友共詩夢晚窗畱清福雲煙
養蕭齋竹石適藏身人海闊境妙卽滄洲

曉起海懷軒庭中獨步

滿院朝光媚高枝度鵲聲苔香知雨足菊燦趁霜晴有託詩多
味無營氣自平亭亭白榆樹倚著綠雲橫

坐鏡鷗齋題壁

五歲朝京小剎那學書習射興如何三邊節概朱弦直千載功名破硯磨放眼寥空歸雁小寄閒老圃得秋多鄰翁時約菊桑落不惜衰顏日日酡

有悟

四千載內事相因蒼狗雲衣變態新好播經綸歸實濟漫耽竿牘損精神宦途滯滯才逾練道誼艱難守益真盡養天倪應有待敢移亮節愧青筠

學福齋雜興十首

樹杪秋聲聚凌虛走雪濤遠眸隨度雁左手待持螯筆退書名振花明酒價高吾生原曠達不用讀莊騷

小閣低如舫雲蒸四壁花琴囊隨趙抃詩膽敵劉叉瓦竈添樾炭資甌鬪越茶團圓真樂具嬌女話牙牙

矮榻宜盤膝
氍簾護醖寒
酒傾松葉凍
果剝栗皴盤
碁局嫌爭競
詩才喜放寬
菊花自清瘦
莫作傲霜看

萬籟響空際
披裘聽肅然
市喧更鼓外
霜氣寺鐘邊
花纈詩香助
閒情茗味圓
如如平意浪
妙語偶通禪

我富恰殊眾
披裘擁百城
頭銜忝卿貳
心迹尙書生
史冊增奇氣
齋鹽老宦情
雋游懷五岳
胸次起崢嶸

堦戶同蠶縮
斜陽上暖簾
老防蠶性癖
和忌蓼花甜
膳以遲眠減
詩緣晚達添
向平心願切
生計逐魚鹽

凍禽枝上語
深院晚風清
榆古星精映
松青石氣并
無才甘吏隱
有味是書聲
濡筆揮千紙
龍蛇腕下成

滿徑藤陰翳
吾廬陋可銘
芸編忙客子
菜把累園丁
語默皆關道
榮枯任委形
三餘功足用
柔日且溫經

識字多憂患閉門休著書
離寬容菊傲霜峭趁簞疏
花月催時易冰霜逼歲除
燕南梅信少辜負灞橋驢

鐵幹蟠風吼蕭齋起暮寒
鐙花大歡喜書卷靜盤桓
閱世心增懼韜華境轉安
天門冬釀熟臘雪聽迷漫

過城東李春湖副憲

宗瀚

寓齋

輕車小駟度城陰金石交
深屢過尋插架鄉媛小清
祕閉門風味勝山林

詩夢杉湖疊唱酬輒紅塵
裏復句畱閒開翠墨論戈
法絕倒楊南仲一流

冬月二十三日雪

大地兜羅頓改裝頭番破
臘喜堆場禪香白塔毫光
見畫意寒山絹素長枯柳
陂塘看鬪鴨紅鑪毳幕記
烹羊燕南冰凍梅花

少手拗松枝共佛傍

卓破蒼苔柳栗攜眼明羣玉鳳城西潑寒門巷條條柳不夜簾
櫳樹樹梨暖折壺春爭泛蟻影疑店月誤鳴雞偶矜指爪成兒
戲妙相猙獰搏怒猊

似掌花繁照座妍尖叉懶鬪愧髯仙鎔銀人海都平浪種玉藍
田倏有年報賽齋鐘聲殷地進鮮曠騎轡朝天多情何遜工延
賞消息鹽梅領獨先

翾風蝶粉是耶非苦費形容思入微土銍燒春鄉夢淺山廚煨
芋壯心違嬉冰瀛海初飛鳥較獵灤河屢合圍瞥眼辛盤良會
屆敦槃香簇菜芽肥

和李春湖副憲雪中過訪卽事原韻

昔年操袂共眉班近喜扶筇訪竹關入座苔岑聯舊雨捲簾松

雪對蒼顏康駢談藝塵囂外思話襟期水石閒好趁諫垣休沐
暇賞奇甌語約時還

衝霜纔退紫宸班忽漫輕車款鶴關金石醕交推李郭龍蛇筆
陣逼歐顏招尋裙屐官衙側卜築林亭角里閒清祕許窺增眼
福圍鑑題品未言還

海懷軒雜興步張船山舊韻

釀雪同雲淨蕭齋暖勝春升沈憑眾口海雪感畸人茗椀飄香
密盆梅破臘新翦鐙閒讀史緒論忌因循

凍雀風檐噪鉤輈語太繁竹籜香作海榆蓋翠當軒世治無籌
策心虛學寡言天倪原活潑何事懶窺園

唐碑甌蠟舊名帖集來禽翰墨增文福林泉有會心苔岑研黛
和梅雪跨驢尋壯歲堂堂去頻看屋角金

四十猶如是功名惜已遲喜聞前輩政懶和近人詩狂語追千
駟奇書借一瓶天隨真樂具兒輩莫教知

仍疊前韻

京宦宜疏放名園報謁遲雄譚推信史勇改是新詩醉斫蟹八
跪游攜酒一瓶地鑪寒煨芋心事老僧知

奇石綳雲葉高枝棲雪禽纖蘿得風趣瘦柏抱冬心妙境憑空
悟孤懷耐澹尋家山青可挹買不費兼金

几列尊彝貴庭涵竹樹繁起樓愁少地懷海偶顏軒宦久防隨

俗交疏漫放言

予客歲自南海歸取太白懷海
凌滄洲詩意顏子軒曰懷海

參軍詞雋逸善

病憶文園

鮑宮詹桂星
昨因病乞假

瑾戶同蠶縮融融暖窄春披裘疑釣叟刻燭愧詞人得火唐花
麗掀泥凍筍新飯餘詩幾律鎮似例堪循

彌陀院送客晚歸

石鼎松陰峙荒寒選佛場凍梨僧面悴風柳客心忙天淨山容出冬晴旭景長送人頻作郡歷碌此車箱

春雨坐寄懷軒

瑤瑁雲輕釀雨天苔痕綠醒小階前舊書重把疑尋夢往事低徊欲悟禪醉倚纈紋回酒面聲沈巷口賣花肩翅塵波漲虹橋路孤負嬉春鴨觜船

初夏獨遊崇效寺喜值姚學士元之

宣南連日走風沙快靄來參佛子茶好雨會將新綠洗穠香何礙短籬遮花前琢句三薰就意外逢人一笑譁有願箋天成幻想輕陰常此護雲霞

龍泉寺晤蜀僧

紹祖

卽題方丈

樹古鴉頻集園荒鹿尚存問年僧臘老坐久竹牀溫鄉夢峨眉
雪風光曇碾村自羞蕉葉裏何日悟塵根

三載剎那頃重過識我不畫廊脩月改詩碣片雲畱茶半通禪
載花深引展游地偏稀熱客且緩控煙騶

壁嵌張船山
太守詩碣

三官廟

老衲如花賈芳菲補竹關鹿場新葦織魚滬亂蒲刪倖薄堪沾
酒身閒欲買山漁樵聊混迹共聽晚鐘還

曉乘馬見鬣鬣亦有白者感賦

束帶毬場曉據鞍驚我馬也華顛雄心伏櫪猶千里汗血從
戎感卅年漫說追風空冀野恍疑衝雪躡燕然坐消髀肉同增
齒攬轡無殊引鏡憐

雨中簡蘭雪

不見城南吳季重
老友飲噉知何如
襟期向來較梅瘦
蹤迹年時方竹疏
荷鋤蒔花少隙地
學圃蔽根真隱居
小池拍岸增漲淥
衝泥肯賞快雨餘

雨後出門晚歸坐味雨草堂

如酥細雨抑輕塵
淨洗槐街眾綠勻
五月蒲榴爭饋節
六年車馬太勞人
迎涼詣客披襟爽
隔巷看山潑黛新
歸向草堂閒味雨
摘蔬燒筍約比鄰

新葺味雨草堂詩以落之

南園新結小茅堂
鹿眼籬笆縛作牆
羶鶴倚桐雙影雋
老魚吹絮半溪香
肯輸郊野風光潤
稍覺農家歲月長
剝棗烹葵心事足
幽風時讀雨三章

瓶中折枝芍藥

明豔珠光麗瓶花愛折枝泥人顏色好恰值半開時

大樹庵借觀圓覺經消暑

雙林小坐暑全刪一縛佉盧靜破顏情障最難超愛水益心未免戀名山輪蹠火熱憑爭路蒲褐蕭閒且閉關解識扇賓宗密旨心澄靜照澈瀛寰

十四日雨後過鏡鷗齋題

連旬梅雨濯素襟水窗晏坐清塵心嵐光更比宦情澹池水偏遜詩思深廊腰脩竹漏晴旭亭角濯莽撐濃陰洗耳何須覓槃澗階下細泉鳴筑琴

冒雨至大樹庵和東坡徑山晚歸韻

僧廊蕉飈雨聲疏曲徑苔荒欲倩扶飯後齋鐘瞻首座鷗邊明鏡拓雙湖靜謀與耳聆泉筑澤下憑人笑瓠壺衝淖巾車歸緩

緩喬林鳩婦巧相呼

游金山寶藏寺

鞭絲遙指寶崖西
躑躅山花趁馬蹏
撫檻澄湖訝杯窄
捲簾煙薺界天齊
豆房雲罨涼移榻
蘿薜苔深蝕舊題
幸撇周妻何肉累
圓庵便欲結巖栖

題天光寺壁

谷虛靜聽足音
磴石壁精巖壁穴
窗暖翠浮嵐千萬
巒峯疑駭浪勢難降

古柏輪囷合抱
麤撐空圓繖翠煙
鋪枕崖結箇團瓢
住初地禪師肯借無

舄下疏鐘一杵圓
捫蘿高據眾峯顛
垂楊幾簇禾千頃
僧指前村是冷泉

冷泉在龍象山西北

金容滿月煥如新妙像劉藍枝入神千瓣蓮
趺千佛見毘盧頂上見眞身

殿角斜陽淡滲金撫松獨立暗沈吟
名山再到吾難必爪雪鴻泥寄梵林

西方寺看凌霄花訪苑丞嵩

阿禮

不值和壁間梧門先

生舊韻

入寺訪良朋四壁空所有奇石繡苔錢
滑膩不留手凌霄羣女蘿翠蔭分虛牖
可惜正花時我來未攜酒明年當再遊
僧言時太久不如看稻田秋深問湖柳
莞爾對奚奴其言是與否

世上惟山雲已難據獨有寓目便詠之
毛錐幸在手木犀證禪心天香吹滿牖
譬彼歐陽子意醉不在酒清涼境夙耽
暖席不厭久淨眼拂高荷搖情倚疏柳
緬彼蒼霽游有此佳興否止

抱冲齋詩集卷十七

長白 斌良 笠耕

西征解弢集一

獲鹿道中曉發

日出遠峯紫鞭垂我馬黃林香沾露溼溪窵貯雲涼風急看衣
線天寒裹糗糧西征膺
簡命迅速掃欃槍

上安村

懸崖盤石屋鞭指上安村秣馬兵停轡求漿僕叩門瀚雲深箐
密噴雪亂流奔飭紀王師肅無驚旅客魂

井陘

巨石突中央奔湑勢激昂斷橋危柱亞高塔野雲荒鴉陣盤殘

壘漁舫艤夕陽丹楓疑赤幟煙外尙飄揚

固關

萬馬立關下一夫雄可當層巒肖螺髻細路走羊腸峽仄風逾響城圍日倍涼太平輕據險鎖鑰重金湯

青玉峽

石骨巉巖草樹青秋雲如帶繞湘屏蜀中秀削應輸此不厭輶車五番經

太安驛

嵐翠埽眉痕丹楓谷口屯定橋通石埭山市聚雲根板屋山神祀詩亭瘦句存園花兼巷柳相憶總消魂

正辛巳胡具體題

趙城

簡子舊食邑紆迴瘦轍還郵亭遑駐馬山縣早休衙風樸民多
壽軍行里不譁羈懷欣頓豁霜葉豔於花

聞喜道中見田家種菜寒碧盈疇懷味雨草堂兼寄六
弟

蒙茸結束鎮星馳老圃閒園豈暇治寒菜一畦荒似菊秋山幾
點瘦於詩爲謀祿養常多感倘樹邊功亦數奇辛苦持家煩弱
弟臨汾飛雁動鄉思

韓侯嶺

一線青天劃螺旋陟嶺頭雲煙分巨壑鱗甲振高秋才大世難
馭功高賞莫酬眞王還作假好伴赤松游

由可河至潼關

秋鐙影裏整輕裝聞說今朝欲渡黃驃從迂迴經犂确長年邪

許放舟航雄關跨嶺臨無地太華穿雲削有鉉跋馬秦川神自
王龜茲萬里奮鷹揚

臨潼喜晤吳澗蓴明府

曾貫

時引疾歸浙

十年雪屋共青氈兩會秦川洵有緣磨盾正飛疏勒檄捆書竟
棹越江船天懷澹定三生福宦海浮沈幾輩傳循吏儒林堪合
傳荷衣容易說歸田

旅窗翦燭話西征雪壓刀弓萬里營當局謀猷多簡要旁觀規
戒最分明肘懸金印思投筆手挽銀河看洗兵銘閣鴻勳非夙
願早歸絜養白華賡

渭城涼雨作深秋黃葉聲中酒半畱愧少韜鈴堪禦侮敢云骨
相足封侯九邊戎馬羣賢策四海聲華一舉收凱撤承恩移節
日攜樽重話舊湖樓

太峪

申年曾冒雨淋浪絳節重過峯鬱蒼風定嶺雲披絮帽霽餘山
鷓弄笙簫淵凹流水秋心白石罅疏花菊意黃駐馬呼童添半
臂崦西候較縣東涼

邠州坡

竹轎嘔啞雙緯牽丁男魚貫陟秋煙飛泉瀏亮穿紅樹翠嶂玲
瓏漏碧天薦客瓜壺猶昔日如雲戈馬復今年參軍早建平戎
策不要詩名萬口傳

涼殿峽

削翠巉巖飛鳥度嶺雲變滅分朝暮驟綱氈笠影明漪瘦影淩
兢儼寒鷺瀑飛灌耳琴筑音千條響出浮嵐深喬松虛籟奏水
樂好詩孤抱圓秋心範水模山清興愜彷彿蘇髯吟出峽怪底

雷輶變調多萬里莎車莽戈甲

瓦亭驛

浣襟塵糝訝霜勻古驛荒寒望未真峽底樓松撐偃蓋忙中靈
曜逐奔輪未攜謝朓登山屐偶學林宗墊雨巾明日六盤空翠
裏貂裘早檢陟嶙峋

六盤山

翠嶂通西隴欽崎怯馬蹏摩天峯勢陡繞烏雪光淒鴉背低頭
見騾綱點豆迷谿坳添築壘雄勝一丸泥

螺磴成之字紆迴有六盤只緣層嶺峻倍覺早秋寒跬步冰淵
凜當胸赤日蟠倚閭懸切久修札報平安

晚抵隆德縣

雲坳藏小縣日午客停鞭溜急噴沙直峯迴抱郭圓詩情黃叔

度鄉思杜樊川秋雁翔寥汰音書望爾傳

西征紀事賦七律十二首

鵬冠

召改賦西征投筆居然萬里行險阻爲余增閱歷邊關從此樹
功名冰山路滑寒籌餉毳幕鐙紅夜點兵迅掃羆狼威易振久
安綏服費經營

滅滑休兵已十年從戎

恩許玉綸宣漫誇武庫龍韜習叨忝勳門虎旅嫻郭相單身入
回紇陳湯羣策下居延樗材敢望圖麟閣祇願烽煙靖塞垣
白面論兵措置乖休循塞種擁蜂來武夫妄殺挑邊釁傖父深
文召禍胎開道兵殘化援鶴孤城鼎沸元狼豺捐軀畢竟殉王
事功過分明足兩該

漢書休循出蔥嶺西本塞種
無城郭當卽今之布魯特

勁旅遙徵下吉林五千鐵勒蹴雲深兵驕最忌貪饕肆將勇端
推智略沈外患易防憂在內足寒難治恐傷心斯民衽席過無
警紀律嚴明未易任

聚米爲山夙未諳八城形勝且圖南關中士馬遙難集紙上兵
戈詎易談遠近卡礮教慎守險夷谿徑密偵探須知重譯回通
事謫詐嚴防語太甘

戈壁黏天浩渺途草痕泉脈歎全枯一夫止渴梅難種萬騎防
邊秣待芻拜井湧泉神異少莖薪撤屋計謀疏黃金論斗儲胥
費憑仗

天威速掃除

幕府軍書盾鼻磨雷霆怒奮瑀戈咽喉要隘須嚴戒羽翼妖
酋不畏多蔥嶺寒森冰滑澁柳條邊隔雪嵯峨天時地險均難

恃第一師干克在和

聞說牙旗駐肅州九邊輪轉屬鄧侯桃華馬後征夫感楊柳樓頭少婦愁轉戰花門須改歲換防瓜代恰逢秋屯田議守籌綏服長治端資潞國謀

直從天上下將軍掣電橫飛露布文車戰夙欽楊德祖火攻端藉武安君邊聲聲發低羌月馬色荒寒接塞雲萬丈長繩繫西頸運籌及早策奇勳

防秋都護逞驕奢關茸傳聞重可嗟鎮撫荒嬉娛狗馬誅求瑣屑到茶瓜狼貪囊飽波斯藏漁色魂消異域花砥柱狂瀾期力挽好修忠信服荒遐

如雲戈馬鎮西馳疏勒于闐莽繫思埽穴一年猶恨晚登壇四十未嫌遲志存將母心休亂身爲籌邊聲草絲移孝作忠臣子

事惴誠已荷

聖人知

草窗夜雨客談兵襲掩倉皇下四城
丸蠟飛書潛內應糧鋤望屋忽橫行
癡羊肆擾原無術風鶴譌傳易有聲
雲集羽林期一鼓犁庭尅日慶功成

欲游大覺寺未果四疊查初白舊韻

祁寒遙夜費薪蒸春透梅梢弱線增
龍節罷馳千里轡鼇山歸踏上元鐙
懷人短刺看磨滅詣客輕車日式憑
待覓蹇脩衝雪去孤煙一笠訪茶僧

十三日大風和查初白舊韻

夜讀蕭齋寂狂飆木末生側聞山骨撼
虛受海颶平殷地鑪鞴扇排空橐鑰迎
暄霾蘇幕護寒驟濁醪傾虎豹嚴關踞
蛟夔陸

海爭箕星芒爍灼桴鼓震鏗鉤帆飽潮吞岸弓鳴草接城鵬盤
矜得勢鷁益恰方行憶昨趨邊塞羈棲感弱莖影纓垂窳窳絳
蓋儼支撐柳潭墟煙暝沙涼驛雨晴錦淙吹淡沱頑礫擲崢嶸
嶽麓凌秋度郵亭信宿成疏鐘黃葉寺曉爨白雪程茅店車脂
轄槐街柝換更搖情銀燭燄批夢綠蒲聲露鶴氄氄警村雞隔
膊驚幾曾攀毳帳宛訝奏蘆笙院想鳴珂玉林翹拂翠旌低隨
羊角轉迅逐馬蹏輕畫角連雲斷漁鐙隔浦明塵襟期埽滌幽
賴助淒清涉世憐浮梗匡居念遠征虞庭薰解慍八表協颺賡
歸自隴西倏經弔月感賦此什

還家兩見月如弦夢警秦關路八千藕孔竟逃兵燹阨梅花重
結雪霜緣常依萱閣參生佛小謫蓬瀛亦散仙不聽征鼙聆臘
鼓聲聲敲出太平圓

回翔粉署歎郎潛伯玉知非少七年家運多艱遑肯構

近欲築自有餘

書屋未果

聖恩未報敢歸田演禽敬設芸香帙走馬慵誇杏葉韉刻意括囊坤六四鐙窗三復白圭篇

五弟松垞自徽州來札有暑冷畱僧稱上客之句因之

偶成

一繩南雁晚霞蒸棣萼牽情觸忤增傍敗細書征驛路詳披重剔草堂鐙茶綱香每因風寄

月前五弟託鄰主簡寄六安茶

竹榻涼思對雨憑

別駕務閒丰致雅衙齋上客半詩僧

夜坐和查初白集中舊韻

唐花繞座彩霞蒸斗室春和一倍增茗沸輕漚地鑪火詩勝新草夜窗鐙長鑷黃獨香思刷矮几烏皮倦嬾憑堆案楞嚴看爛

熟薰修誰識在家僧

哈密瓜

西域稱殊產東門種莫方翠盤初捧賜
幾几爛生光香烈頻婆亞酥凝蜜乳涼蒲萄歌陋漢錦荔驛卑唐老圃增惆悵詞宗費
審詳蒂粘蔥嶺土筐染峪關霜爭食鬢童喜均分媵婢忙狂吞
疑露瓊細剖豔丹瓢金棒遙難致金棒瓜產自沙雅爾甘脆異
常數日即腐閩內不能到
銀刀齧卻當鎮心餐沆瀣礪齒截冰肪錯落狸頭纍斑斕虎掌
張銳同回紇帽甜勝塔兒糖哈密龍岡產瓜其稍銳者土人呼
爲回回帽塔兒糖回人膠糖如塔
形每宴會異物懷邊傲饒叔益慨慷願教蕃馬致遑厭老饕嘗
陳以享客
草閣分甘話天山引蔓長時鮮過夏薦期代及秋防紫塞猶鏖
戰青畦恐悴荒軍丁趨荷戟旁午急輸糧抱蔓詩篇異尋支職
貢將尋支瓜產
大食國聖朝威四服珍果遞新疆

沈助教

學誠

見過和查初白嚴矱庵侍御卽席元韻

吾人貴淡交久敬翻不熟會須聯襟期勿取重節目縣帽沈東
陽久別意頻屬樂育趨成均羸車碾塵躅曳裾叩蕭齋傲岸倚
霜菊栽栽昌黎公道原相緝續嗟余賦質迂立身松柏獨蠖蟠
人海中多君致衷曲瑣屑計鹽齋殷勤惠珠玉跼然雙屐音近
答簣簣谷梅賞銜凍芬韭翦早春綠擷華評畫縑樂靜屏箏筑
豈惟郊鄙吝兼可厲靡俗脩阻悵巖城襍被豈遑宿有時出餘
緒研詞揮簡牘發詳意表語委婉堪朗讀命蹇磨蠹纏動輒乖
所欲貞抱原憲貧漫作步兵哭好繹老聃旨遠辱貴知足我亦
退飛鷁偃蹇守齋屋遺編期澤躬園菟賴撐腹絜養待清溫處
儉休刺促近鑒公餽譏飛奔易折軸守雌保吾貞諒直交勉勸
歲暮感懷和查初白除夕飲許時庵寓齋韻

介馬星馳瀚海沙
簡書敦迫忽還家
擁裘靜對甌鑪火
得氣旋開暖窖花
樽散朝衣行可典
租逋易酒賤堪賒
雞蟲得失尋常事
喜向觚稜閱歲華

西征還閒居無事坐
寄懷軒見殘菊猶存
紺梅初綻因之遣興

虛室小於斗
冬暄暖勝雪
菊遲留晚節
梅靜抱清芬
覽鏡驚鬢白
觀河縐面紋
客來烹茗鼎
閒坐說從軍

題李生

育文待詔青綠山障子

峯影堆雲波映空
瘦藤扶過板橋東
林閒屋是停雲館
一對黃鸝話晚風

樓臺金碧李將軍
衣鉢流傳待詔文
一自竹西朱老化
畫叉終

日對斜曛

謂朱素人

空江湖落未揚帆
燈火瓜州露兩三
輕抹微雲孤塔聳
隔江山色認龍潭

重葺味雨草堂值微雪喜題

緯蕭堂舊復經營
恰值天公玉戲迎
隔樹凍雲吹冷絮
翻濤石銚響瓶笙
嵐光捲幔參差入
畫卷焚香次第評
除卻扛壺人送釀
斷無剝啄到柴荆

檐虛雲靜壓坡陀
榆柳陰疏掩映過
一帶短籬編鹿眼
數椽老屋掛漁蓑
微雲山抹輸淮海
毒瘴浸淫感伏波
槩澗棲遲躬繫養
提戈谿徼較如何

壽因寺

短垣四抱圓灌木
千章挺僧房比櫛
如梵香散清影背
游緬擷芳小憩憶
參耆重過值元冥
積雪互西嶺高塔
對巔屹穿雲錐

脫穎老鶴當門巢瘦佛負牆冷衝寒羸馬嘶盤陣凍鴉迴乞米
僧未歸殘陽壓松頂

良鄉丙舍喜見臘雪拈查初白梅雨舊句試和二十四

韻

潑水森衾鐵山茨氣倍嚴響并何撼撼灑密訝霰霰鹽絮陳言
屏尖又險韻拈側身偕螻伏濡沫想魚噉瑩潔原無忝光明恰
少嫌臥袁高自尙訪戴誼難兼遼塞剛盤鶻層雲欲蔽蟾潢流
銀漢迴瓊削闔峯銛幸慰三農望毋煩五色占搓酥填小令浣
粉費輕縑帽脰崇堪仰充虛下益謙抽毫詞足騁夢魘語羞譖
排悶平蕪眺回看短薺黏荷乾披髮髻柳禿壓髭鉗土銕薪蒸
溼薰籠篤耨炎羔羊烹毳幕野馬散冰檐更憶軒窗竹誰家戶
映柑沽春時拉伴乞脯或傷廉宋繪冰鏗轂唐花暖護簾談深

罪玉屑吟苦撚霜髯不謂菟裘住頻教虎僕添寂寥仍飯顆衰
白愧郎潛靜賞心多妙孤斟意未厭詩腸拌淨滌漫許俗憂悵
向晚步出柴荆薄醉題壁

披裘倚柴荆氣候晚倏變雲同雪意慳零霰積空旬卓杖風帽
斜待歸好山戀浣粉峯蜿蜒煙中互隱見還舍然竹柴題壁炙
冰硯村飯亦復佳萬錢同下嚙盤登野雉肥春買茅柴賤薄醺
意有餘煦育曾隔炫平生記游蹤信宿良鄉縣

題南屏僧際祥山水小幀

湖光浸嶺嶺遮寺擘絮風柔挂半篷此是西湖舊光景山僧偷
入畫圖中

半湖水氣淡如煙秋雪蘆飄比絮顛一自奚童行樂去遙汀惟
賸鶴看船

欲訪陳老農

麗天

不果

麗天工指畫充
皇糧莊頭

鄰村耳熟陳驚座潑墨雲山指爪深暖日烘晴泥巷滑蹇驢衝
凍費招尋

齋堂鼓臂貌諸天玉簪衣紋法老蓮準備花時開酒甕擘箋乘
醉畫香禪

且園老去閭山遠墨林衣鉢誰繼諸後來作者乏能手生動還
推馬負圖

馬負圖西安
人亦工指畫

夢禪猶及攬詩袂指戲心傳今已無不圖妙繪寫生手寄迹識
字耕田夫

廿五日自良鄉還京

五日菟裘成小住蒙茸星飯理歸鞍
欵杷掛壁知農暇臘鼓治街逼歲闌
冰合波心看玉瑩雪晴山骨露巉巒
再來應是清明

節官柳旗田綠意團

歲暮書懷

沿街爆竹聽喧闐喜住觚棱對燭圓
梅格高寒香更遠松根盤錯節彌堅
零星排日催遺帖薄少何由致俸錢
我自抱神棲以靜元卿作達及新年

雪中欲訪豆花莊陳麗天指畫墨山水不果

俊風陸海翻蛟鼉鱗雲翳埽玉宇波披裘傾耳作蠶縮山茨振
比鳥巢窠瘦詩瘠竹寫未罄排籤凍指煩頻呵寒邨陳翁老蓮
裔寺壁曾憶圖天麾拄頤長劒照腰玉渲染雄麗靡如他青鸞
讀畫神自王維摩祝法痊沈疴拍案不覺發狂喜酒戒拌破傾
紅螺畫叉在手擬撻去欲換惜少山陰鵝帽檐每企叩漿澗稀
逢杲日風晴和凍泥沒髀過未得孤斟閱處顏空酤安得御風

入蓬華竟造豈待巾車過墨雲深淺彈指見獲寶那數陵陽歌
且園閭山足抗手貌出老屋梅邊坡嘉招修阻同畫餅室邇莫
致思如何冰花糝絮礙苔逕雀凍虛設門前羅撐空浣粉蠹寒
岫林巒天貺實已多何須鼓臂輞川畫余今皺面知觀河

歲暮過白雲觀

獨揮輕策遠衝寒閭苑初經偶駐鞍寶鼎紅些鍊真火蒼松玉
立護仙壇片言活眾仁心溥一得含元道體完我亦年來知養
素擬逢燕九重盤桓

自良鄉縣還家夜坐味雨草堂書懷和查初白夜坐有
懷張漢瞻韻

人海一萍浮來往一何速詩題幾束箋夜翦草堂燭自況魯人
山蹇步笑屢躅偶然樂澹靜蕭齋坐幽獨晴雪賞晶瑩唐花眷

紅綠琢句愛髯蘇菜尾書半禿已悟魚在釜肯效猿升木今年
所厯境動輒興感觸臘醅翁正濃花雞燉已熟倘徉隨遇安吟
傍梅花屋

新正二日過味雨草堂喜成

舊闢茅堂石筍西興來素壁試新題稅無藻飾風希古窗掩松
杉翠欲迷打疊翻犁耘早麥不勞犇馬聽晨雞初正未破饒佳
致老掾求書送赫蹏

初三日見博爾濟吉特淑人遺挂感成

驀看遺挂華堂畔觸忤閒情暗淚彈春仲記曾親藥裏朝正忽
漫薦杯盤誰與最怕雙雛問淑人生二女尚幼肖否頻教老嫗看事到
無聊還自慰西征未累受驚歎

山莊晚眺

一堆落葉聚塘坳
灌木千章煙靄交
卓杖柴荆無箇事
閒觀老鶴共爭巢

贈買孝廉

元慶

囊書襆被遠游燕
日築糟邱費萬錢
大嚼愛嘗羊熟胛
羈孤應歎雉朝篇
報章悅恨懷司馬
賃廡蕭涼老伯鸞
鐙火三餘猶足用
慈恩看裊杏花鞭

新春書懷

豔陽天氣喜融和
草碧閒園趁蝶過
老馬病時花轉盛
小胥歸後句偏多
樓邊潑翠疑看畫
柳畔呢鶯當聽歌
心事向平拋未得
偷閒且復買漁蓑

雨後過蒹葭閣

密雲潑墨樹梢盤
韋曲煙光入據鞍
柳帶綰春如有意
蘆錐冒

水不禁寒一官潦倒世何補七稔馳驅居未安鴛舍清虛龍樹
古從師晏坐借蒲團

雨後步聽綠山莊見野花弄芳妍媚可喜因憶城南花

事兼柬曾賓谷侍郎

煥顧南雅吳蘭雪

籬根諸葛野花明陡覺輕寒際曉生淨埽風軒聽夜雨欲裁佳
句報新晴芳洲橋影隨波上松杪雲光共頂平正擬扛壺約同
社餘花晚筍醉西城

游龍樹院東偏登蒹葭閣閣爲鮑宮詹

桂星所構僧月

亭爲余言之並求題其蒹葭閣畫本

浮靑小閣俯煙光麥隴桑畦遠近望三面林霏開畫本半庭花
竹助詩香未除名障吾何隘小結閒盟鷺共將賸有殘僧說遺
構鮑昭託興太蕭涼

小有餘芳卽目

柴扉流水草橋斜
小築茅亭枕落霞
煮酒買魚休入市
蒹蘆中有釣師家

沿畦蔬果媚晴曛
依約農歌隔浦聞
指點紅門飛放泊
纔垣似帶遠黏雲

聞道豐臺竹樹芳
南人買醉喜相羊
桔槔聲裏提壺喚
夢憶吳趨杭稻鄉

同懷弟法良校刊
男崇福謹校重刊

抱冲齋詩集卷十八

長白 斌良 笠耕

秋曹讀律集一

三官廟看花

采蘭溱洧多流風壺觴修禊幽懷同燕京峭寒滯花事小芳三月吹薦紅桃花屏掩春山重金羈不稱鶴髮翁雪眉老衲幽徑闌朱紫手植煙霞中一朝得氣松桂外眾香織錦春如海底事嬉遊士女忙爭拾明璫交甫珮我生傲岸不受憐金貂醉擲羞言錢邀遊婪尾厭嗔嗔沓獨待空山梅早發

冒雨游萬泉寺

橋矮蒲香入天垂雨氣圓寺荒雲偶住僧耄佛偏憐結夏堂無客沾春杖有錢歐梅頻宴集勝槩想當年

右安門外看花晚至三官廟和查初白小飲祖園水亭

舊韻

南郭菟裘勝清華屬近坳畫輪翻逐電雪驚散疑星地曠籬樊
竹波寬風約萍西山原舊識樹杪露尖青

野卉出郊媚高槐蔭寺青昔遊同社燕新迹泛池萍遠聽漁榔

答愁縈鶴髮星羅塵何處避十八好煙坳

右安門外多賣花人
豐臺左近共十八村

新築柴門落成

槃澗棲遲避地偏柴門小築傍溪塹預防剝啄逋頻索略助推
敲句忽圓莎徑僅容羅野雀繩樞劣可繫耕犍苔階碌碌低於
几時約鄰翁話夕煙

遊龍泉寺

聯翩裙屐斂禪關散步長廊百五間玉版懶參浮玉李塵根未

淨愧塵顏梵香曲繞花前塔簾影青排竹外山火熱輪蹠欣小
憩松寮消得片時閒

觀空誰會妙明心畫壁莊嚴紺閣深散秩宜招方外侶名山未
許俗人尋詩朋舊墨餘苔碣蓮沼風泉響石琴惆悵高城魚鑰
閉冰輪伫待湧訶林

偕容齋侍郎

裕恩

游萬善殿觀荷卽席

眉班散直曳鳴珂聯轡相羊踏徑莎鳳艣棹迴維柳隴珠簾鉤
上影魚波嶒嶸紫閣凌霄漢縹緲疏鐘出薜蘿韋杜城南吟賞
遍清華畢竟遶鸞坡

圓相僧迎貌出羣七條衣搭藕花熏伊蒲膳美心齋肅薝蔔香
微鼻觀聞松溼翠涵天半雨荷翻涼度檻前雲須彌頂瞰旃檀
海欲記金鼃愧少文

秋夜偶成

涼意襲庭戶宜人獨早秋
茶香蔬筍配書味竹鐙留舊事
猛猶省閒身退易修雄心今略減
無夢到封侯

雨後歸竹齋

盈途汗潦氣潛薰
顛簸車箱似踏雲
歸向小窗攤筆硯
槐陰翠滴竹香聞

秋日獨游法源寺和東坡游徑山韻

太行靈脈趨燕山
馬邑流匯桑乾川
龍蟠虎踞京邑壯
莊嚴寶刹堪周旋
醯雞處甕邈無悶
比璞韞櫝珠藏淵
朝京七稔歎奔走
於世奚補霜盈顛
日惟詣府事竿牘
幾曾歸署然金蓮
委蛇歲縻太倉粟
偃偻長綬垂蜿蜒
邇聞韋曲豔花事
巾車藉叩曹溪禪
青鴛我結白蓮社
闐闐滾滾譚刀錢
宣南塵漲任擊轂
四

禪牀大宜酣眠野心馳騁制狂象道管活潑瞻飛鷲有生歲月
不滿百心膏自竭空憂煎飛箱鬼谷術機變慧定梵夾誇清便
低眉老佛獨余眷偶參鷲子心怡然願乞羈提八功水普沾大
地歌豐年

偕五姪

延志

至青龍橋登湖樓間眺適值苑丞嵩

阿禮

招游昆明湖循隄至廓如亭

相將阿阮醉湖樓邂逅同人作勝游鏡拓波光峯寫翠風光淡
沱更宜秋

拉伴長隄趁意行蒲風細戛玉珂鳴柳陰敬讀金牛頌應陋昆

明漢石鯨

昆明湖邊金牛乾隆間有御製頌鐫於牛背

不踏湖山二十年鶯聲柳色尙依然春鉏側翅應相笑何事空
羸雪滿顛

韞紋萬頃鑑虛堂天際荷風灑面涼舊記十洲今始到蓬壺宛在水中央

憶昨趨隨豹尾班恪恭何暇賞煙鬟對鷗涼樹又魚艇今日相看始覺閒

風沙眯目燕南重煙水澄鮮那得經何幸自饒山水福帽檐重叩廊如亭

聽綠山莊感興

卓杖柴門聽晚鴉山葵翻愛境幽遐
童放膽收蜂蜜老圃關心問菊花
蛺蝶身輕低抱葉鵲鴿羽健漫移家
莫嫌茅屋多荒陋定較金堂耐歲華

與沈助教

學誠

話舊

廿載朝京共相逢各老蒼功名仍爾爾歲月惜堂堂霜重松還

直秋深菊自黃種蔬聊養拙不是學庚桑

侍太夫人早膳歸草堂作

已覺愆尤集知非少六年艱辛孱骨健憂患道心堅天闊孤鴻直秋高萬籟圓荷衣躬絜養不羨擁貂蟬

新秋和張船山舊韻

涼生暑初退竹院靄秋陰牆古蟠蘿薜亭幽得桂林簡青開遠志蓮白趁孤斟檐雀何喧聒休撓靜者心

處儉

處儉宜任達其如白髮何家居奇句少涉世戒心多喬木山孤立秋花錦一窠城南勝煙水苔樣買魚蓑

八月十日偕苑丞嵩

阿禮

五姪

延志

子

延福

游金山寶

藏寺和壁間文端相國

鄂爾泰

舊韻

下馬入深隄天風側帽斜橋敲訝雲重山好忘途賒洗鉢玉泉
水染衣金粟花卜鄰余願遂頻問老僧家

煙墨天然畫朝晡氣象殊湖波遙似定嵐翠澹疑無椒實攢砂
點茶甌潑雪珠西窗教挂起短簪界平蕪

一家人影聚環坐借禪牀野馳緣蘿竄雛僧剝棗香風廊沈夕
籟苔壁繡殘陽莫憚巖城隔離衾愛竹房

重過棗香山館感賦

入門榆柳影毵毵竹榭荷汀舊徑諳三易主翁園莫必

園爲綢
住舊址

後轉售家霍吉如北郭復歸河南
觀察岳祥七年間已三易主人矣屢游巖壑我猶堪霜清山果

垂朱實峯近秋衣溼翠嵐登頓自知筋力減且來幽館駐游驂

黯黯輕陰護竹亭靜謀筭籟滿清聽卽看園戶收畦芋擬約鄰

僧倒酒瓶望去林霏開畫本再來霜葉繪巖屏詩成分付南飛

鵲早晚黃柑寄洞庭

近喜遠亭弟署
常熟令卻寄

秋雨書悶

陡覺衣絛薄秋陰送峭寒寥天雲影厚泥海轍痕寬竿濫官閒
易珠量粟貸難閉門三徑闢籬菊傲霜看

梵香寺

依門雙樹古陳迹梵香聞蕃馬來生客土默特台吉札薩克
年班多貢居此寺風
旛證佛心廚煙穿屋直黃葉覆階深題壁畱鴻爪花時待再尋

晚至正覺寺

棲鴉古柳帶橋長隨著鐘聲陟講堂松走虯龍蟠寺壁僧方瘦
鶴步風廊入塵有相定虛妄經世無功成老蒼諧俗虛名思自
懺阿師何必叩行藏僧知遠問余姓名
歎曰此聞人也

鄭比部

敦允過寄懷軒觀家藏晉唐諸帖卽贈和昌黎

送無本師歸范陽韻

讀書須讀律習勇先習膽
昆吾截夢絲當斷貴果敢
籍甚鄭當時譽望久延攬
按獄雋不疑明察洞埃壒
公卿聆讜論署諾首微頷
研律等味經蔗梢細吮嗽
覆盆雪奇冤圖扉啓幽黯
威鳳集祥風蒼鷹屏苛慘
材大整以暇游心樂恬澹
孤峯聳癯鶴澄波卓秋菖
飲醕慕公瑾倚玉愧葭莢
移趾過蝸廬先施實銜感
茹古具奇癖同嗜蒲葅歎
自愧百無能蹉跎鬢霜慘
磨蠍纏命宮年來境圯坎
下帷養疏慵低眉事鉛槧
匡居歎無聞繹騷貌顙頤
良朋指愚悵鍼砭豈煩憎
交締金石堅樹漫蜉蝣撼
才名衡嶽齊眾山歸一覽

自彌勒禪院至盧溝橋晚宿新店雜題

豆房插腳喫茶禪
庵暖村墟上晚煙
迤邐駝羣魚貫若
馱鈴激

宕逐風圖

子城叢薄睨蒼蒼沙磧黏雲日色黃河凍流澌冰下吼挑鐙猶

記宿龍堂

是年秋送客過此
曾借宿龍王堂

棗林繚繞屋三間牆短青排萬笏山寒爲酒人增氣象布帘低
處頓開顏

寒具堆盤餽飢麤當墟客過聽招呼北人獨豔江南景村壁高
懸虎阜圖

兩行髡柳冒長隄霜草淒迷送馬蹏風物依稀似前度據鞍遙

憶謝征西

日前送釋堂
先生過虛溝

不成行役小淹畱信宿郊原少別愁風雪峨眉程萬里一炊鑪

火說縣州

家僮自蜀中燕
山弟處來都

送客過彌勒禪院

入門滿院梵香清
小坐團蒲怖鴿迎
鑪火正紅茶半熟
徑松清碧雪初晴
芒屨挂壁僧何往
米汁分甘佛有情
廨舍東西宜置榻
機雲同聽桔槔聲

除夕

沿門桃茆爛如霞
爆竹聲中歲序加
髀肉坐消鬚鬢白
十年心事負梅花

元旦坐寄懷軒

行年四十五
元日靜吟詩
處境儉如此
心期想可知
松高憑雪傲
梅峭惜春遲
乾雀緣枝噪
應多喜映眉

正月二十二日卽事

魚鑰千門午夜開
紅旗一騎踏奔埃
樞臣密奏天容霽
絕域生擒頡利來

戰守邊庭集議多事籌善後待如何
郎官自滌雲司筆十萬蠻牋和凱歌

暮春感興

日月不我與花飛又暮春一杯聊復爾
萬事且隨人身澤詩書富情閒魚鳥親
桑榆收或可和衛葆吾真

崇效寺看牡丹

一笑雲堂對辯才前年人復看花來
乘時煙景無窮幻冒雨穠香次第開
梵閣莊嚴增氣象綠陰清潤滌塵埃
雋游似我偏多暇池館何須自買栽

畱雲榭落成

園西結構有高樓偶爲看山教葺修
穿榭夏雲涼壁絮拂檐濃蔭碧於油
客來小坐論心密雨過浮嵐舉目收
待得秋深紅葉

爛錦裁步障照簾鉤

五月七日揚威將軍長齡西征凱旋

皇上御勤政殿恭交虎紐印行抱見禮

恩賜四團龍補掛

賞戴三眼花翎並

賜詩以昭寵遇良與聞盛典恭紀其事

秉承

廟算西陲定元老酬庸矍鑠年授印

彤廷威望重覲

光金殿禮儀虔冠飄孔翠開二眼袞錫雲龍補四團抱膝朝天
殊遇少鴻勳媲美鄂襄傳

題大樹庵西禪堂

高樹當窗立青於竹外山雨聲松隄靜客夢草堂間半卷殘經
啐三生俗念刪定中真意味卓杖數鴉還

夏日同諸寅好宴集竹韻齋和汪比部

銘謙韻

山齋蒙密靜且幽風篁虛籟涼宜秋竹林高會集羣彥攜榼載
酒相賡酬輒紅薄笨日趨省百重堆案聊息休蝸廬小築數弓
地樓觀胡敢凌丹邱揭來草堂尙樸茂豆棚瓜架縈西疇冠岑
虛構亭四照螺青一角浮嵐收支筇登頓腰腳健南樓清嘯輪
風流宣武坊南乏煙趣窠石叢篠爭勤搜客過手彈想碁局亦
有拇戰誇藏鉤歡劇嚴城豈憚阻仁看蘿帶搖潛蚪康駢譚藝
倍融洽陳遵車轄何須投瑰詞額頌鮮瓊報愧以瓦缶儕鳴球

題竹韻齋新篁

綠鳳蟠空際瀟湘雨意團煙光宜近水詩思入憑欄居可一日

少修成百尺看借君應不惱削作釣魚竿

游通州李氏園

老柳當隄臥城隅淩一灣蒲香涼蛤吠荷淨野鷗閒水榭堪消
夏風廊曲抱山人偏不住雨徑任苔斑

普濟閣

刹竿紅映寺門偏通路東來此換船已見罟師收水利網絲輕
撒浪花圓

袷衣初試愛新秋短齋黏天翠影浮橋外吏人將意到瓦鑪潑
乳獻茶甌

平下聞

極睇鞞紋翠潏長遠汀鳬雁似瀟湘夜深銅篷橫吹好應有魚
聽水底藏

碧甃銀泥照水塹雙松偃蓋染蒼煙紛紛肩負人如蟻開口初
停運米船

高碑店閘

過閘風光又不同茅茨吹滿秋蘆風棹迴萬笏排煙際蓬背青
山似剡中
淺渚魚標白葦攢撈蝦校初拂波寒篙師艤榜還相語水色天
容此最寬

二閘

燕南鎮日走風塵雲水光澄洗眼新自買輕舫旋沽酒貪游未
必盡南人
危闌百尺俯晴空虛牖玲瓏劈面風倒揭晶簾珠顆濺波聲不
讓呂梁洪

東便門

車聲灌耳殷雷震東便門東馬到遲第一風光須領略夕陽高柳喚船時

偕苑丞嵩阿禮游遺光寺

殿閣崔巍丹牖新光明象教覺凡塵繞階花藥晴逾媚釘壁真

書迹已陳殷壁懸邢江僧大楷半晌論心霏玉屑五年彈指肖

奔輪慈師行脚崇師晤小結茶緣亦夙因是日慈師雲游與方丈崇師茗話而歸

尖頭瓦屋無雕飾樸茂禪宗儉可風澹泊從來能耐久光明悟

澈總虛空小亭高枕煙樊碧濯木陰連夕照紅他日香廚過一

飯懶偕瘦可鬪詞工慈海工詩和宗室奕公泚紀游一東韻五十首崇師嘆曰已犯綺語戒又起爭鬪心

矣宜亟改之

曉起

萬家酣睡際支杖獨閒行花露曉仍溼竹風涼暗生虛亭還野
色遠市自喧聲坐久心光照居然眾象清

贈李方赤比部

璋煜

濟南李比部長身松檜精公才較犀利宦况共詩清酣古同吾
好論交望爾成何時草堂上煮酒話平生

昆明湖寫望

曉值廊餐轡乍停橋西風籟滿清聽鷗隨夕照衝煙艇天繪秋
光入畫屏琢句秀於山蘊玉逢僧閒似絮遭萍谿雲波縠溟濛
處只覺寥寥滿目青

邀友人游龍樹院看山樓小集和竹垞集中舊韻

爲踐尋秋約林坳並轡來遠沿孤棹埭相餉竹根杯篆靜紫花
塔莎香覆講臺紗籠新句裏貪讀漫言回

野寺鄰韋曲僧疲應接勞
留賓頻掃榻馬忽騰槽
黎照齋龕火蠅鳴石鼎濤
題糕佳節近拉伴此登高

選勝江亭舊參茶數梵宮
車鄰秋水外僧話夕陽中
種樹成青

蓋分瓜想蜜筒海藏樓一角
澹對得鳬翁新種龍瓜塊尚未成陰夏間曾在寺中臨

瓜甚甘美

過屢堂頭熟支筇款竹關
初心緣起閣一面許看山
東偏鮑宮詹桂星爲

築凌虛閣山色爲牆遮蔽僧月亭復募金於西偏起看山樓朱府丞爲剏落成之
庶儉從人賃松高共

客攀好乘休沐暇問菊破餘閒

欲登陶然亭未果策馬至客臺寫望

連鑣小隊指城南雪碕蘆灣玉鏡涵老圃負暄商買菊未荒猶

賸徑三三

崇阿迢遞隱江亭灌木陰連古堞青
咫尺坡陀儼圓嶠蓬瀛仙

住肯教登

是日有女眷游賞欲登未果

平岡低帶晚嵒畦秋水平沙散馬蹏向夕浮嵐如畫裏湘屏齊拓鳳城西

遠亭弟

徵良

倅常州督糧通路還任蘇州詩以誌別

督轉勞鞅掌扁舟下直沽湖寬多受月鄉近易裁書勸我加餐

飯逢人訊起居嵩陽同皖上兩地憶何如

謂燕山嵩亭兩弟

旬浹華堂聚驅歌別緒仍壘簾聯雅奏畦菜翦蔬鐙秋老菊三徑風高雁一繩江東民力絀官戒懍春冰

漫以兄爲念升沈總夙因圖書延世澤梧竹寄吟身集苑甘違俗知機妙入神靜中觀物化寒盡自逢春

漁庵

小屋低於舫氈簾暖意融窗延霜樹綠籬綴晚花紅靜夜攤書

卷秋晴理釣筒匏尊兼瓦缶樸茂古人風

冬夜懷二姪

延禧

三聽黃雞唱冬窗不肯明宵寒鐙有暈風定樹無聲誰假奇書
讀聊沽濁酒傾阿咸嵩洛住遙憶正含情

冬日散衙歸步味雨草堂偕汪鏡人茂才

正觀夜話

案牘眊昏兀若山印牀紅照蠟鐙還小園闌寂今何似獨樹柴
門鎮日關

菟裘舊豔輞川圖鹿砦修成傍井梧添箇煙霞新伴侶秋深槃
澗聽相呼

叔度汪洋古誼敦煮茶煨芋話寒村譚深肌粟山肩聳衣桁香
濃漏月痕

十月燕南暖未霜短籬菊牘幾枝黃潑寒小巷飄微雪染得西

山絹素長

題陳挹之主簿

經

魚計亭圖

吳趨耳熟陳驚座
攬袂春明眼獨青
魚計商量歸興劇
異鄉無此好林亭

甌椎行役載巾箱
兩晉殘甌手拓藏
樂石祥金欣壽世
一編集古續歐陽

月細風尖瘦蹇馱
蒙茸結束歷關河
頭銜曹掾青袍換
可憶鴛湖舊釣蓑

野鶴閒雲逸性情
無端腰笏謁公卿
買田陽羨真良策
莫負初心戀薄名

贈汪茂才壘前韻

林梢潑黛認寒山
撐杖昏鴉接翅還
草閣燈明童睡熟
襌裪老

鶴守松關

瑋瑋雲天潑墨圖十分寒色上庭梧南塘深處輕冰合遙聽蘆
根雁鶩呼

回首樅陽夙誼敦藤軒敲枕夢江村羈懷旬綫披圖觸賴玉煙

迷溼粉痕

壁懸杏花一幀
顏動江南鄉思

窈窕果愚靜護霜疏枝香繪月昏黃桃花潭水情深句重說汪
倫託興長

同懷弟法良校刊

男崇福謹校重刊

抱冲齋詩集卷十八

長白 斌良 笠耕

秋曹讀律集二

坐江西司堂

腰綰銀黃帶綬長
雲司猶是領南昌
臨民好勵心如水
判牘俄看筆有霜
出入羣黎關性命
允明片語辨譴張
蒼鷹乳虎多谿刻
須識刑寬育物祥

柴門晚歸

羣鴉下寒林
策杖人歸否
稚子候柴荆
斜陽挂疏柳

鹿圃

落葉滿谿坳
細疊蒼苔上山鹿
飲泉歸亂踏
深林響

贈汪鏡人

燕趙知名士機雲共訂交青袍猶泛梗絳帳亦懸匏夢逐春池
遠詩兼翠竹敲盤桓方改歲誼重比投膠

問字欽淹博朋簪屢過尋叢書娛靜日歸雁託鄉心梅凍香原
淡松蒼雪任侵樅陽潮上下南望益沈吟

八口羈通路齋鹽獨繫思窺園良有暇賃廡歎無貲狷介謀生
拙迤邐得解遲緇衣深有願移榻盍來茲

郭盒偕鏡人夜話

向晚蕭齋過霜林月色明煙霞清道性梧竹助書聲春早緇梅
坼談餘白墮傾蒼茫人海裏誰得此閒情

曉過金鼇玉螭橋

白霧細如雨輕寒暗襲裘匡居猶掩戶待漏已鳴騶霜滑橋邊
路煙迷島外樓日趨青瑣闥閒鷺可知不

客懷贈鏡人

漢柳愁司馬湖尊感季鷹
羈懷仍落拓歸計得何曾
埋炭深鑪火梅花小硯冰
有誰知許事且倒酒如澠

舊蓄盆梅園丁爲灌溉
培養方冬花甚繁絳移置書齋
喜題

夙種梅根積辭肥園丁培護復芳菲
眼明舊格枝重譜晴昵初
銚女乍歸半藉琴牀憐影瘦
暗縈書櫃覓香微閉門迴勝林逋
逸衝凍花耐伫夕霏

喜雪和厲樊榭韻

談藝園鑪約早成連宵詩思共春生
硯冰墨膠書無俚梅凍香
深句有情汪茂才有梅凍香甚佳
夏玉翠搖添竹韻爬沙聽徹打窗
聲虛堂敘雪名原稱不數何郎水部清
敘雪堂同人理刑之所近日李方赤汪彝齋唱

和甚多

長至日大雪邀汪鏡人小酌用韓昌黎醉贈張祕書韻
匡居愧獨處兩耳寂少聞自君館余家敬業得賴君豚兒質愚
魯我愧更不文締交到君子淡若秋天雲豈效佔畢儒標榜徒
齒芬長身野鶴聳大雅真軼羣說詩兼析疑翦燭忘夜分譬彼
膝間楚力怯焉能軍品醕愛公瑾不飲意早醺蒹葭倚蘭茝氣
味胡氤氲西園邀踏月農屋樂我云睇空忽玉戲鹽絮看糾紛
欣賞教魚羔枯腸飫腥葷當窗兩梅樹幽蒨儕湘裙旣醉載歡
呶嚶鳴陋飢蟲齋高向禽接書異班馬薰漱芳咀其華插架羅
典墳頤光聊養志田在奚愁耘方今定西陲紫閣圖元勳賢良
登有時莫歎寒日曛

雪後登話山亭寫望次沈石田題畫韻

燕京亦有好山水白塔青松相對峙雪晴振策陟坡陀萬瓦鱗
鋪溼雲裏范寬粉本摹不得當世丹青陋餘子天公爲我張畫
障醲粉樓臺看尺咫自家真趣醉彌滿蟲飲狂歌不知恥我詩
意造笑無師乘興抒懷聊復爾

雪後過漁庵和厲樊榭韻

披裘偶過閑漁屋牆角檐牙積素凝瘦柳絲拖黏冷絮老梅香
孕翦春冰歸遲頻撥銅槃鳳聽瑩微喧石鼎蠅檣散經年稀入
直免教衾鐵襲青綾

和李方赤比部見贈韻

金雞宣赦典讀律漫裁詩稽古皆關學通儒轉類凝締交緣舊

翰甲申秋有人持詩索和後余承乏秋曹始知爲比部所作宏獎愧新詞濫廁親刑柄他年待作師

冬月廿八日瑞雪盈尺因檢昌黎集中詠雪韻和之

如繪菟裘好衝寒選勝來瓊妃齊破笑羯鼓不須催樹凍飢鴉
啄橋迴野鷺猜積深池作坻糝密礎成堆撫檻飛鴻渺趨朝小
駟回乍看黏石角旋埽集庭隈瀝急窗將溼吹枯枿恐摧蜚聲
騰閬苑流彩照燕臺乘興春堪買呼朋句屢裁翠低千畝竹香
沁半弓苔魯縞佳誰贈吳縣輭或接明禪陳瓚壁纓佩琢瑤瑰
濃羃羃林霧輕筵抑路埃暖縈胸鬪炫羞對鬢霜皚雙穗期登
麥千倉定阜財藍關迷浩蕩蜀棧想崔嵬虎豹嗥幽谷龍蛇起
蟄雷竭來排兩膳何處泛霞杯謝女題原稱梁王讌正開喬松
猶傲岸小草漫栽培清白乾坤滿攀躋磴道纔庾園聊種菜傳
鼎待調梅量闊高卑覆雲同遠近該因風飄便旋疑月認遲徊
喔喔雞升屋呦呦鹿走垓伶仃剛屑玉葭琯訝飛灰箏澀指銀

甲鑪紅煮芋魁冰山噓莫倚砥柱兀難隕徙倚銀蟾濯蹕蹕寶
象虺玉峯森崑岷元氣渾胚胎戴舫慵難掉巴歌陋孰推薰籠
娥敢怨珊玦客何哀潤早消時疹豐真弭歲灾人皆欣玉戲我
且酌金疊忍俊山肩聳形容水部才驪珠探的礫鶴毳舞毵毵
茗熟朋臻矣書成筆快哉吟餘驢作蹇獵罷雉為媒有象心同
印無私度本恢誤休當絮捉傳語覺童孩

讀斜川集

琅函紹聖晨星少

斜川集南宋以後流傳已少寶典重搜已無全本

寶典重搜舊觀還

翁學士方綱自承樂大典內錄出斜川集成全帙

竹友龍洲譌本正

宋謝幼槃竹友劉改之龍洲二集共

成六卷皆非舊本

惠州小圃逸詩刪

惠州游小圃詩五首茲集僅載二首

行希靖節丰標

迴

叔黨晚年自比淵明節操和陶詩甚多

聲溢蠻陬海若環

集中隨侍其父東坡先生謫儋耳時所作

六

百十年精粹顯

自紹興迄今六

焚香細讀暢心顏

竹友集龍洲集名與

蘇叔儻相類後人竄改其集以欺世非正本也後經鮑廷博以文趙懷玉味辛二公重訂新本足爲藝苑津梁

連日大雪復和昌黎韻

平尺徵庭瑞歌豐協楚謠寥天寒尙落凍地溼難消作岫環亭
角疑雲帟嶺腰鴛迷棲古瓦鵲墀墮纖條醺粉融蘆汊晴縣帶
柳橋玉山肩并倚銀海目頻搖衾冷吟當夜裘輕賞趁朝方圓
隨境託簾溷逐風飄飲劇開疏綺圖新拓素綃一冬三白見疊
詠興猶饒

和李方赤雪中散直韻

雲司剛退食冰霰織空中朗映生花管輕疑孽絮風 詔書寬
庶獄卽敘定西戎斗室饒春氣梅舒一翦紅

冬日感懷

委蛇郎署歲蹉跎覽鏡還看鬢忽皤學效申韓聊復爾勸齊衰

鄂果如何事經盤錯才逾練心映壺冰氣自和晚節共誇園菊
燦一枝曾受皼霜磨

嘉平四日坐寄懷軒靜攝

採薪晨偶抱枯坐意怡然一榻維摩室初乘馬祖禪明生竹窗
雪寒洹藥鑪煙細讀斜川集海山奔几前

正月六日出西直門寄懷燕山弟豫州

輓繡天街蹕路長初正雲物兆嘉祥春冰欲泮猶含白岸柳
將舒半吐黃西郭乍聞簫鼓競南衙已覺簿書忙暮思露冕宣
勤壯從事佳音達帝鄉

九弟年內查辦捻匪至南陽計期應有家言寄至故未聯及之

寄遠亭弟吳中

升沈分定豫難量君拜監州我作郎吳苑聯鑣看擁笏雲司繼
武復含香循聲父老侈談美宦况朝京應接忙仁看甄才書上

考朱旛驚鼓邁黃

喜汪鏡人到館

與君三日別節物換新年賀歲輪
蹏還論詩壁壘堅茗遲香更
烈茶豔色疑然輭繡天街淨春
燈踏月圓

上元日偕程楞香比部

庭桂

傑直

圓明園晚宿大樹

庵仍疊戊子夏題壁舊韻

傳柑逢令節鐙火爛黿山郎署趨公早
僧房借宿閒月隨雲暗
轉詩共酒難刪待得穠香發扛壺約往還

答程比部疊前韻

鄉思偕宦蹟舊夢戀虞山借寇誠何敢

程比部有虞山無恙班否願借寇君還之句

荆偶得閒茗花童漫淪梵葉手全刪
廠店遨頭早嬉春並馬還

上元夜偕汪鏡人可齋弟踏鐙戲成四絕

雲埽蟾光滿意圓
踏鐙侶趁嫩寒天
砌香梅餅饒南味
拌費奚囊買醉錢

阿蘭獅象雪花裝
開士優婆熬瓣香
佛界祝釐增勝概
泥金萬字壽中央

驕民籠袖走長街
山鹿齋邊鐙市佳
五色琉璃光燭處
六萌車畔簇金釵

陸海魚龍取次迎
兒童聯臂鬪輕盈
絕勝說月當廳爨
圓鼓金環唱太平

游懋亭公相

長齡賜園

纔款銅鋪徑不迷
平泉花木復畱題
香凝畫戟堂新
賜泥壘雕梁燕舊棲
一角雲籀依水曲
數峯晴翠可窗低
麴塵波膩春初漲
好仁聽鷗酒試攜

接凌茂才芬書

猶記摻祛別柁樓
菱蘆晴雪送歸舟
故人書到動隔歲
薄宦久羈成遠游
甕底舊醅爲石凍
篋中小扇爛銀鈎
槐街塵漲驅車路
輸與探梅載酒儔

是日晚出德勝門望雪後諸山過長公相 賜園值徐

星伯小酌後至楊通侯

芳

夜話還宿大樹庵以山氣

日夕佳爲韻

南陌積雪凝餘寒
猶未刪翠滴徑松
碧冰釋溝水潺湲
浮嵐薄於霧
淡沱縈遙山
一鉞塔影瘦
絮雲時往還

貂裘拂輕颿
蓬蓬靄春氣
藉茸土膏融
農事翻犁未
我馬老識途
款段心早慰
紅些捲風鏗
西淀車聲沸

秋曹竿牘紛披勘
鮮暇日吏胥儼伺
候奔走挾書律
遨頭溯臘

尾四番西郊出借榻依淨明松寮安且吉

鼇山鐙架收已歷上元夕栖鴉噪疏柳寺門帶寒碧晚堂報齋鐘塵滌物難役老衲下階迎袈裟紛月白

名園成邂逅小坐亦復佳故人爵通侯聯袂時與偕柯坪戰羌渾鐵蓋擒狼豺耳熱話天山酒酣增壯懷

王司馬

掌絲

自河南來知燕山弟近狀因用東坡別子

由韻寄之

司馬大梁來在郡未晤汝赤手翦萑苻櫛沐當風雨獻歲值燕

九云自洛陽歸研鞫定爰書飛章未有期

燕山赴洛陽擊獲擒匪王三帽還省蘇案

通日尙未報到

人生同逆旅百歲等行客衙齋傳舍如胡乃蠶縮瑟露

冕宣壯猷鞅掌按郡行春寒尙珍重池草興遙情

春日游香山普覺寺期昭甫苑丞

嵩阿禮

不至

七寶池涵碧玉勻蒼髯導我陟嶙峋重登講席非生客早倦津
梁是憚人果證菴羅唐歲月源逢活潑佛根塵茶禪默契前三
語竹淨苔香總觸因

力田偶值庚桑叟選勝緣慳複道丞玉塵談經高震旦金泥繪

樹護南能

寺中懸
羅樹圖並三體書題

御筆畫安

僧蒙

賜紫誇疇曩

方丈敬

純皇帝御筆示
澄空和尚詩

室叩來青得幾會惆悵晚堂喧粥鼓煙光看上

澗邊藤

政繁方外過從少密印曹溪履迹賒偈喻衣珠明浴鵲書珍草
聖玩驚蛇山深野筍堪供饌春凍細桃未著花整轡不嫌歸路
晚四山涼翠溼袈裟

寶藏寺清涼厂

層軒虛構傍峯椒靜敞罍睇沈寥四面嵐衣蒼翠合一規水

枕玉隄遙詩題禪窟懷前輩僧指苔碑話勝朝蔬筍且毋供雨
膳殿春來賞不須招

黑龍潭紀事

千年藤蔓絡虬松妙構迴廊月樣同聞道桑林虔致禱深潭指
爪見天龍

康熙年間

上祈雨忽潭底伸出龍爪示見遂加封號焉

由紅山口取徑至黑龍潭

纔過安和橋遠陟紅山口樵徑躡單椒欽崎得未有微嫌斧鑿
痕刻露驚怪醜石圓滑展齒峽逼礙襟肘我馬雖未瘡矜持轡
在手黃篋架高棚坐集淨明友俗書頗端整茗供記誰某覺迷
如筏喻由斯妙峯走衣袋函旃檀虔心禱靈阜桃枝代柳栗掖
扶度幽藪回香遜飽香方言聆亦偶

土語進香客入山爲飽香回家爲回香歸者相值去

者須止足

試問樂善人佛意果參否

避路云

黑龍潭

松陰黃瓦冪潭潭乍款銅鋪細路諳一笑前游僧尙憶三年舊
感客何堪秧鍼稻隴苗初秀法乳珠泉酌更甘夕照嶺銜催整
轡來朝小住致深譚

晚抵大覺寺

松栝徑深杳東峯饒夕陽蒼髯增古致天眼印香光客到皈三
乘僧閒住兩廊寺僧無執事者皆住門外兩廊十年忙淨滌真宿贊公房

夜宿四宜軒

高館倚雲椒虛窗延靜賞只疑山雨滴詎識夜泉響竹疏風乍
過松密月初上信宿已公屋清言溯疇曩
經窗耿禪鐙肩聳冪山氣天香鼻觀通觸塵盡禪味茶板傳已
歇齋鐘遠忽遞煙霞具幽抱不寐山心慰

夜起題方丈壁

豆房煙霽夏峯青
妙境如如悟澈清
琴筑空山慕不得
松泉竹籟雨風并

領要亭恭和

御製原韻

虛亭高曠枕空山
千歲蒼藤靜照顏
俯視潺湲聲繞榻
下方猶仰竹梢看

塔院

肩輿衝曉煙螺磴
出山半黝然雲初興
輭絮擁雙髻年來方翹
障比笑魯漫漢選勝
穿煙樊蛾綠許飽看
檀未綻白花纍纍碎
珠貫四面香風吹淨
悟通鼻觀喬松俯谿
坳晴濤聲拍岸入門
見五塔師弟祀分案
迦陵紹臨濟天章仰
襄讚允宜眾信崇

靈巖開震旦監院臘八十高行追可粲煮茗拾松枝驚起野鼯
竄拈髯待尋詩前峯啼鳥喚

三月十二日周比部

祖植

熊郎中

莪

李員外

壽彭

招集

龍樹寺看山樓卽席

麥隴泥融綠意滋車盤篆徑到偏遲偶來蕭寺題襟集恰值虞
田選獵時冒水蘆錐方脫穎綰春柳線半成絲雲天璫瑁含疏
雨譚藝康駢合遲辭

電埽鉅筒政偶閒僧樓腰笏賞煙鬟騷人蘅杜懷韋曲詩衲梅
花憶越山槐古閱人驚瞥眼桃嫣將暖映酡顏嘉招已踐扛壺
約櫻筍齋廚再往還

重修竹韻齋詩以落之

丹雘工師市月忙草堂初落喜如狂教排几案規前制重度琴

書計舊藏盡闕
蟬窗延樹色稍通
蝶路放花光論園
買夏殊非策高臥
能招六月涼

暮春南苑雲司倬
直晚間散步宮門
值周樞曹清張農

部祥河傳水部繩勛汪中翰元爵周廬小坐喜成

圓笠輕衫粹胸仍
幅巾瀟灑值行勝
不知橐筆樞廷彥
錯認流觴曲水朋
石鼎茶喧風乍轉
甌廬坐久月初生
屬車幸託瞠乎後
邂逅嘉招得未曾

海會寺

海會知名寺前朝
蹟未荒豐碑猶壯
觀古壁自斜陽神
廟垂衣肅江陵柄
國強雄豪歸想像
粥鼓振僧廊

高皇曾駐蹕獵罷
此畱題

天翰昭殷鑑梯塵
覺世迷垂楊小亭
角暖翠亂峯西指
點紅門

近飛英逐馬蹏

端陽前一日

寒峭香羅未疊裳
催詩陣雨作端陽
依窗翠竹抽新筍
繞屋風泉漱晚涼
懶與羣兒爭艾虎
喜隨慈母奉蒲觴
料量米券煤逋外
更有求書應接忙

雨後坐竹韻齋

竹涼疏雨過
隔院暮鐘清
不寐攤書卷
無求減送迎
龍拏看柏
拗虹臥想橋橫
園中新葺
朱蘭橋落成
煙趣宣南最
菱塘濬已成

西園納涼

何處堪消暑
西園話夕晴
棚高風乍入
樹密月遲生
無垢何須浴
聽香易有情
貪游眠覺晚
鄰柝報疏更

喜雨

方塘滋灌溉雷雨助功成
箭激羣流匯珠跳萬點鳴鳩呼穿樹
遠魚夢繞荷清撫檻添涼些
沽春醉友朋

竹韻齋夜坐

乍糊窗戶雪光明坐久微涼傍閣生
霜月靜看移竹影夜鐙大好讀書聲
官忙倍覺閒堪樂才退翻誇句易成
我笑新霜徒自苦爲他黃菊助高名

冬月中浣邀雲司諸賢好小集澹園卽席

把臂相將笑語溫朋簪飛蓋過西園
訟情勤按爰書少道管深探古誼敦
籬菊霜嫣畱晚節盆梅香綻漏春痕
晉陽刑柄蒙勅詡好趁公餘倒酒罇

尙書堂構未全蕪喬木陰敷儼畫圖
勉勵廉隅延世澤敢云林壑足清娛
王曾接武躋薇省賀監何年乞鏡湖
八座起居躬絜

養爲郎忝荷 渥恩殊

贈陸靜亭少尹

友仁之蜀

行裝初滌大梁塵
遍覓縹緲走市閭
乍覩昆明身入畫
重登眉嶺雪爲鄰
薇垣共羨栖吟侶
蓮幕于茲得雋人
玉潤冰清同契洽

洽

靜亭爲子師程蘊齋夫子壻

好襄西蜀治還淳

冬日雜咏

經營卅載此蝸廬
義取韓詩號有餘
竹几繩牀麤位置
自矜樸茂好家居

臘鼓聲中歲序增
煤通米券疊層顏
原因乏陶朱富與化
推移未足憑

窗油明靜映松蘿
屋潤宜顏安樂窩
翠柏緗梅盆益滿
能生萬物是春和

介弟開藩鎮蜀吳人誇金穴好規模
懸魚封鮓多清況慣把虛名累老夫

敘雪虛堂日往回如林竿牘案邊堆
尼山簡冊箴規在無訟須從聽訟來

鴉衣衝凍舞郎當乞米書來日幾行
坐有寒交真意在圍鑪相與話家常

牽絲傀儡暗由天得馬亡羊事偶然
除拜親朋看爛熟靜中性海恬真詮

索字徵詩刺屢投陶情翰墨自優游
邦期王謝高門第也學書生冷應酬

自笑年來秀句無冥搜拈斷白髭鬚
疏林瘦石窗前景收入吟編儼畫圖

膨脝窮袴裝縣厚種菜園丁笨伯同煖窖看花樹雪釀翻教清
福屬庸庸

千羊毛毳極輕柔不惜兼金買一裘堪學嚴陵閒釣雪富春何
處覓扁舟

斗室鑪紅煖似蒸夜呼小婢炙書燈枕邊得句朝難記筆硯忙
尋翦燭膽

送趙竹泉太守炳言出守松江

攙祛粉署正翱翔 特召朱轡擁旌纔見雲司除太守早躋
藥榜歷仙曹勳追召杜臣衷亮學練申韓

帝語褒召見時上云汝係榜下分部行走刑名是本諳習海國一麾榮畫錦棠陰近接

伍胥濤

領袖三吳綰綬新髯蘇才調軼羣倫漫矜舊雨仍同列恰喜長

才作替人

蘇菴石先由刑部守松江今調首郡遺缺竹泉適補誠西曹盛事也

駐馬定應歌襦袴

剖符翻得

飫鱸純雲間郡合王孫領翠墨

趙松雪書赤壁

賦石見嵌府署廳壁似與竹泉有舊緣也

芻蕘細採語謙冲轉漕曾經船趁風物力東南須愛惜租庸億

萬極豐隆魚鹽充物民情靡雀鼠譁張訟牘叢鄭重下車初發

軻好憑樸茂振盲聾

陪都扈

蹕拂征裘緒論頻聆每借籌品望圭璋加拂拭吟篇

珠玉屢賡酬眼明相賞驅黃外面熱論交伯仲儔

竹泉兄弟刻言雨樓甚相

契倘念同岑懷敘雪魚牋早晚附星郵

贈容齋侍郎

裕恩

由吏部侍郎擢熱河都統

鋒車纔自藩陽還都護嚴疆鵠印頒慶衍

天潢宗牒近威行

藩服撫綏嫺塞雲遮馬寒踰嶺霜月鳴雞曉出關羊叔風流需

坐鎮外臺免綴紫宸班

掌銓澄敘山公啟夙慧兼修鷺子禪持偈偶參風外桂明心早

喻火中蓮磬捶峯峭形禪歷僧帽嵐青畫省連

磬捶峯在潞陽道上僧帽峯在

都統衙齋左近可望見之佛說使君通淨果故教瞻禮大西天

須彌福壽布達喇極宏麗

皆在潞陽之任藉得瞻禮亦善緣也

彪文粹質體淵冲人海交深屢願中漫說劉盧親誼篤詎知禽

向賞心同探幽共啜雲巖月下直聯吟水殿風唱到驪歌增觸

撥前塵猶泥清蓮紅

曾偕客齋萬善殿觀荷

握手臨歧鬢欲絲宦游良覲易差池草堂客去松應惱竹鳴雲

移鶴未知澹泊襟期身少累雍容讜論治相宜再來渥荷絲綸

寄補袞偕賡吉甫詩

早起和白香山驚韻

簾額聚輕埃瓦溝積飛霰夾幕煖於春寒色晶窗見披衣未盥
漱傍架理書卷夜吟字未安負手推敲徧裡紅老嫗添茶熟雞
鬟勸覽鏡心自怡顏童非醉面

散衙

趨朝纔詰旦散署已斜曛日據推囚案高懸逐客文

客來常值入衙往往

左相米鹽疏料理酬酢積紛紜漫說曹司俗回翔倚白雲

覽鏡

覽鏡還羞雪滿顛文章勲業兩茫然漫言晚蓋桑榆好五十掄
來欠四年

愧蠹魚

晨興日射窗盥漱披衣初意忙心有屬高架理故書尺帙積寸
埃拂拭霑輕裾凝塵灑予面恍走風前閭笑童笑旁觀主人何

拘墟不見東家子萬卷充棟儲但飾耳目玩縹緗照綺疏何須
親點勘檢校同小胥余聞亦莞然曰前詳告渠聖賢遵塗軌經
史勤菑畬上下四千載事理胥求諸嵯峨故紙堆捨此焉爬梳
世閒寶貴物珊瑚間碑磨財裕可立致讀書須三餘邦家可康
濟用舍任卷舒不聞古朕望簡編日相於三食神仙字羽化登
清虛設非孝先腹有愧此蠹魚

同懷弟法良校刊

男崇福謹校重刊